

After School Allaince na Washington:

Ta mira oportunidadnan di cooperacion entre Aruba y Merca

ORANJESTAD- Na Aruba gobierno ta implementando un proyecto unda hobennan cu ta bayendo scol secundario ta haya guia den oranan di atardi despues di scol.

Un bon proyecto, sigur si tene na cuenta cu un cantidad numeroso di hoben ta bay cas atardi na unda no tin supervision, no tin guia ni tampoco actividadnan productivo. Esaki pasobra den mayoria caso ambos mayor ta traha pa cria nan famia. E hobennan ta nan so na cas cu tur e tentacionnan cu tin eyfo. Esaki tardi of tempran por tin su repercusion riba sociedad. Na Merca na unda tin programanan pa hobennan a keda comproba cu e hoben cu ta haya e guia necesario tin hopi menos chens pa haya su mes den contacto cu husticia. Motibonan di sobra tin pa bin cu un proyecto



na unda hobennan di scolnan secundario por haya e guia necesario, den un ambiente sigur na unda tin supervision, guia y cuminda saludabel pa come.

Director ehecutivo sra. Jody Grant di e 'Afterschool Alliance' a splica cu e Alliance ta un organisacion cu tin bou su encargo 26 mil programa escolar den henter Merca. E y su team a topa cu Prome Minister Eman y nan a keda impresionado con Aruba ta trahando duro pa bin cu actividadnan educativo pa hobennan

despues di scol. "E ta algo tremendo y na mes momento necesario."

Ed Spitzberg, Vice Presidente di Desaroyo di e After School Alliance a splica cu nan ta e bos di e programanan escolar den henter Merca. "Nos ta percura pa nos programanan wordo bon comunica den henter e pais." Spitzberg a bisa cu gobierno Mericano ta sostene e programanan aki completamente. Na final Spitzberg a comenta cu nan kier yuda Aruba unda por, mirando e necesidad cu tin



y e iniciativa di Prome Minister cu a inspira nan.

Erik Peterson, e persona encarga cu policy publico di e After School Alliance, a bisa di ta contento ora nan a tende di e proyecto pa hobennan despues di scol. "Nos sa di otro paisnan, pero tambe di Merca mes cu e programanan aki tin un tremendo impacto riba e hubentud. Nan ta wordo guia den haya e capacidad profesional cu nan mester. Den tur pais y particularmente na Aruba ora gobierno sostene programanan escolar

similar na loke nos tin, e hobennan por descubri pasion, hobby, profesion y potencial nobo. Esaki por ta riba tur tereno."

Vice Presidente pa 'Policy & Research' di e After School Alliance' Sra. Jennifer Reinhard, tambe tabata presente durante bishita di Prome Minister Eman. "E plannan cu tin na Aruba pa e proyecto pa guia hobennan despues di scol, ta start riba un base realmente hopi solido. Loke Eman kier implementa ta loke nos tambe ta practica aki. Tin hopi opcion pa e hobennan riba tereno di educacion cu nan ta haya den e oranan despues di scol. Tambe hopi similaridad cu loke nos ta ofrece aki na Merca." Mescos cu e otro Sra. Reinhard a mira oportunidadnan di cooperacion entre e After School Alliance y e Naschoolse Opvang di Aruba. □